

Ti Taetusi

Na Podapodalaina na Leta

¹ Ara Paula na nabulu tana Tamaza, na tinoni tagarunuqu ti Jisu Karisito ko mana vaneqia na rangerange tadiria za mijataria na Tamaza beto mana tokadi ko mari izongia na gikalaina na zozoto za vuani na pangagana na Tamaza.

² Na rangerange beto na gikalai ari za qari vangalingaligita ko taqe korapa geleni gita za na toa jola pa moa tu za taringutinguti vadigita na Tamaza zake sekeseke.

³ Ko pa nana totozo tamijatana nari za ule vakabereni pana tarae na Tamaza za na nana nongoro ani, ko na roiti taraeni na nongoro ani za na Tamaza na nada inaalo za garununiziu ara ko mana roitini za gua.

⁴ Na leta ani za lao tamu Taetusi, ao qu vei na tuqu zozoto pana rangerange taqe makarai izongia.

Na variroqu varialona beto na bule tana Tamaza na Tamada beto tana Karisito i Jisu na nada inaalo mari somana tamu.

Na Roiti ti Taetusi pa Nuza Kiriti

⁵ Na ginuana qa vasuverenigo ara pa nuza Kiriti ao za vei ko mu vatuvizi voleanaria za na roiti qari oqoro okoto beto mu mijata vanyumuria pa okokoto guguzu ketakoi ria na tinoni matamata, aza vei qa tori vavanaunigo tu.

⁶ Aza za pada ko mina tinoni matamata za na tinoni za kepore na nana pake, maka gu na

maqotana, ria na tuna qari tinoni rangerange beto qarike tagigalani na toa gobogoborodi babi na uana duviduvilidi.

⁷ Ura za poreveveina za na tinoni kopu za mina tinoni kepore na nana pake, ura aza za matamatani za na roiti tana Tamaza. Ko na tinoni aza za nake tinoni tututinana roquroqu makana, nake tinoni oqoqanai korakora, minake tinoni digedigere aruna, nake tinoni varivaripera goboro, beto nake tinoni za nyaqo izizongona pana zona selana aza.

⁸ Goto aza za na tinoni vakamu goto tinoni tu, za tavaraguani na leana, za boka gaiti vaeania na roquna, za tuvizi, za toani na toa liosona, beto za aru muleni makana pana uana ikikeredi.

⁹ Beto na tinoni za aru tamana vamauria na varivagigalaina na nongoro tarangena aza ko za boka paranga varivanegini na varivagigalai togazana beto za boka udukia na dia sela ria qari paranga kanakanai na varivagigalai togazana.

Ria na Tinoni Varivagigalai Sekesekedi

¹⁰ Ura kubo ria qari duviduvili, za kobakoba na dia paranga beto qari tinoni varitoka vapiru. Ria kaki puku tinoni Jiu ria qari tapobe za qari vajolai zozoto za na roiti ari.

¹¹ Ria za na tuvizina za mari tangujupuku ura ria na zakaza qari varivagigalaini ko qari izizongodia pana zona selana za zake garo ko bari varivagigalaidi ba qari varivagigalaidi tugu ko qari vapeluku vapiruria ria na tatamana doruna.

¹² Maka dia tinoni korokorotai makadi tugu ria za tori poja vaeanianana tu za ari za gua vei,
<<Ria na tinoni pa Kiriti

za na galegale tinoni sekeseekedi,
na manugu pirudi,
na ngoja tave ududapeludi,>> za gua.

¹³ Na vavakato ani za zozoto ko za vei za mu
uduku votudi na dia sela, ko mari togaza pana dia
rangerange

¹⁴ beto marike tapatiana goborodi na vavakato
leleadu gobogorodi tadiria na Jiu beto na garunu
tadiria na tinoni qari gabala vapeleni na zozoto.

¹⁵ Doru zakazava za qari lioso tadiria qari lioso,
goto tadiria qari paji beto qarike vazozoto za ke-
pore tugu za maka za bi lioso, goto za paji za na
vonanadi beto na monanadi.

¹⁶ Qari ule votuni za na Tamaza qari gilagilaidia
qari gua, ba na roiti qari tabata votuni pana dia
uana qari uleni za qari kilu paleni tu ria za na
Tamaza. Qari lulasa pa moena na Tamaza, qari
duviduvili, beto kepore maka roiti leana bari boka
roitini.

2

Na Paranga Vavanau

¹ Goto ao za mu varivavanaudi ria na zakazava
za garo pana varivagigalai togazana.

² Mu vavanauria ria na marene tiolata
kolekoledi ko marike tinoni gua goboro, mari
tinoni tapangagadi, mari gaiti valeania na roqudi,
mari togaza pana dia rangerange, pana dia
variroqu beto pana dia turu vangaju.

³ Mu vavanauria tugu vei ria na reko tio-
lata kolekoledi ko mari toani na uana panganga,
marike varipojapoja vikere, marike pinauzuni na

kole bukubuku gojo, goto mari varivagigalaini tu ria za na uana leadi.

⁴ Ko mari vatavagigalaria ria na tiolata reko koregadi ko mari roquroquria na marenedi, mari roquroquria na tudi,

⁵ mari gaiti valeania na roqudi, mari lioso na dia toa, mari reko vatana valeana pa dia tatamana, mari valeana lao tadiria na goto tinoni, beto mari kole vapeki tadiria na marenedi. Ko mari toa vei ria za ria na goto tinoni marike poja vikevikeria za na paranga tana Tamaza.

⁶ Ria na marene zae korega tugu vei za mu paranga vaneqiria ko mari gaiti valeania na roqudi.

⁷ Pana doru ginugua za mu vabatidi na mua toa makamu ko mi maka dogodogoro tutina pana roiti leadi. Na mua varivagigalai mi kolea na uana leana, na pangaga,

⁸ beto na paranga vavegolaidi za lenodi na varituti, ko ria qari kanago za mari kea ura kepore za maka za ikikerena mari boka vakezadigita.

⁹ Mu vavanau valeanaria ria na pinauzu ko pana doru zakazava za mari kole vapeki tadiria na dia bangara, mari vaqeraria, marike paranga karokarovoria

¹⁰ marike aru golomoria na izizongo, goto mari vabatidi na dia toa tarangena valeana, ko doru dia roiti mari sari vabata leania za na varivagigalai tana Tamaza na nada inaalo.

¹¹ Ura na variroqu varialona tana Tamaza za pogoza lameni na inaalo za tori bola votu tu tadiria doru tinoni.

¹² Ko na variroqu varialona aza za totoli vatavagigalagita ko ta kilu paledi za na uana vakevakepore Tamaza beto ria na nyorogua ikikeredi tana kasia guguzu, ko ta toani gita pa nada suvesuvere pa kasia guguzu ani za na roquroqu tavagigalana, na uana tuvizina, beto na toa madina,

¹³ tonai taze korapa kulikulini gita za na rane tamanana taze gelegeleni totonai mina bola votu na neqi ta nada Tamaza lavata i Jisu Karisito na nada inaalo.

¹⁴ Aza za vani na nana toa makana ko za ruvatagita pana doru toa ikikeredi beto za valiosogita ko na nana tinoni poreveveina jola aza za gita ko taze ngalingalidi ria na roiti leadi.

¹⁵ Ari ria na zakazava mu parangadi, mu vari-vavanau valeadi beto mu variudukudi pana doru neqi qu izongia. Muke vamalumigo makamu ko mari dogoro vagorego ria na tinoni.

3

Na toa Suvesuvere tana Tinoni tana Tamaza

¹ Muke koroto varoquroqudi ria na tinoni ko mari vainongoro vapeki lao tadiria na banga-bangara beto na tinoni varitokai, mari vataberia, mari turu qaqiridi ria doru roiti leadi,

² marike poja vikevikere tinoni, marike tinoni varinominomi, goto mari tinoni valeana lao tana goto tinoni, beto mari roiti valeana lao tadiria doru tinoni.

³ Ura gita za perangaina ba kepore tugu na roquda, tazeke vatabe, taze tatoka vapiru, beto taze pinauzudi zoku nyonyorogua ikikeredi beto

zoku qeraqera tana toa tini gu, taqe toani na toa ikikerena beto na uana konokono, qarike tavaraguadigita beto gita ba tazeke varitavaragua lao lame tugu makada.

⁴ Ba tonai za bola votu za na leana beto na variroqu leana tana Tamaza na nada inaalo

⁵ nari za alogita na Tamaza za gita. Ba nake roiti tuvizidi taqe roitidi gita za taqe taaloni za gita, goto na variroqu varitokai gu tana Tamaza. Ko aza za alogita tonai taqe tavaliosoni na podo mule beto taqe tavakoregani na Ongongu Tabuna.

⁶ Ko na Ongongu Tabuna ani za tori vuva tari vapugeledigita tu na Tamaza tonai taqe vazozotoa gita i Jisu Karisito na nada inaalo.

⁷ Ko tonai za vatuvizigita na variroqu varialona tana, nari za taqe somana izongia gita za na toa jola aza taqe korapa gelegele kulikulini.

⁸ Na paranga tarangena ani.

Ego doru zakazava ari za qa nyoroguani ko ao mu paranga vaneqidi, ko ria qari rangea na Tamaza za mari tapatiana tolidi ria ria na roiti leadi. Ari ria na zakazava leadi beto qari varitokai tadiria na tinoni.

Na Tinoni qari Varivagigalaini na Varivagigalai Sekesekena

⁹ Goto ao za mu turu peledi ria na toa vevei na varipera paranga duviduvilidi, na tututidi ria na nada tite, na toa varipiarai, beto na variguani na Vavanau, ura na toa ari za qarike varitokai beto kepore veveidi.

¹⁰ Na tinoni za varipiarai za mu paranga vabalua na totozo momoe beto na totozo vinaori. Pa liguna aza za muke galani.

¹¹ Qu gilagilaimua ao za na tinoni za vei aza za na lulasa ikikerena, beto za toani na toa selana ko za leve muleni makana.

Na Paranga Vinaokotona

¹² Tonai mana garunu laoni tamu i Atemasi babi Tukikosi, nari muna podeke vitivitigia ko muna lame kamuziu pa Nikopolisi ao. Ura qa tori rove valeania tu za pala ketakoi tu za mana suvere totonai mina kamua na totozo lomozo.

¹³ Mu podeke vitivitigia ko mu vatana tokadi ari Zenasi na loea beto i Apolosi, ko marike qaqani maka za pana dia rererege.

¹⁴ Ria na nada tinoni za marike toa udapelu goboro, goto mari balau tapatianadi tu na roiti leadu ko mari tokadi ria qari tapata.

¹⁵ Ria doru qari suvere tavitiziu ara ari za qari valaoa na dia roquoroqu lavata tamu. Mu vakarovia na mami roquoroqu lavata tadiria na tinoni rangerange qari roquoroqugami ketakoi.

Na variroqu varialona mi vavaburogamu gamu doru.

Kubokota Adapt New Testament **Ghanongga: Kubokota Adapt New Testament (Bible)**

copyright © 2024 The Seed Company

Language: (Ghanongga)

Contributor: Islands Bible Ministries

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

b15930fb-006d-5d59-8c92-849586c93e2c